



L'Istât in chel an nol dave padin. Al al jere il mês di Lui, e che al fos stât tant cjalt nol sarès stât nuie ce dî, se nol fos stât che al jere dal mês di Mai che il soreli al brusave i orts.

Nono Zuan, dome al pinsîr che chel scjafoiaç al sarès lâf indenant tant a di lunc, si sintive avilît,

ma lu stes in chê dî, nol podeve fermâsi.

Nol podeve lassâ di bessôl chel frut propit in chê zornade che al veve la ultime prove dal esam di maturitât. Cun di plui, dopo dute che fadie, al varès podût puartâlu a gustâ di cualchi bande, tant par che si svariàs un pôc, puar frut, e parcè no, fâsi contâ cun calme lis provis che al veve sostignudis jenfri dut chel esam.

A jerin lis dîs e mieze, e chel frut al jere partît bielzà che a batevin lis vot. Nono Zuan al veve di movisi ancje lui, cundut che prime di misdî, pal so cognon, no lu varès viodût saltâ fûr da sô scuele. Cussì, il puar Zuan, cence sta a cincuantâle, in mancûl di trê cuarts di ore al veve za parcade la machine denant di chel chel grant edifici di indulà che al sarès saltât fûr so nevôt.

E finalmentri, velu là denant dal porton. Dal snait e de muse che al veve al pareve che dut i fos lâf ben. Nol veve plui lis gramulis tiradis come a buinore, che a viodilu al pareve che al ves di lâ a fracassâ cualchidun. Anzit. da sô bocje al someave che i sbrissàs fûr une ridade.

“Cemût ti ise lade Toni, di ce ti àno fat fevelâ vuê...?”

“Nono o ài vude fortune. Forsit parcè che il compit di talian scrit lu à fat su la Europe, vuê, mi àn interogât sul acuart di Londre dal '53. Dutis robis, che o cognòs avonde ben”.

“Moviti monte sù la machine che vuê ti puarti a mangjâ di cualchi bande, o pai jo, baste che tu vuidis tu.”

Il locâl al jere biel, cun di plui tal mieç di tancj arbui e dongje un riul che al passave a pene daûr dal puest indulà che si jerin fermâts. Cun di plui si steve ben: chel aiarin che al rivave des fueis di chei lens e il fresc che e butave sù la aghe di chel roiat a consolavin

“Tu mi disevis che ti àn domandât su l’acuart di Londre dal ’53. Ma tu, ur âstu dit ai professôrs che par fortune non àn fat lis stessis falopis di Versailles, smiezant i debits di vuere ai todescs? E tu vevis ancje di zontâ che i Mucs di dut chest si son dal dut dismenteâts. Cuant che si trate di bêçs a son plui pedoglôs dai ebreus.”

“Nono no dome chel ur ài dit. O ài ancje fevelât dai inglês, de lôr ultime cjatade, di Brexit: dal referendum par saltâ fûr dal dut da Europe. E mi soi ancje permetût di dîur, che se lis robis no cambiin si van riprodusint lis stessis cundizions che nus àn puartât tal ’14 e tal ’39, indulà che si sin massacrâts tra di nô. E dut pe ingordisie de alte finance, des multinazionâls, des bancjis dai stâts nazionâi che a soflin sui sentiments che a dividin i popui.”

Intant che so nevôt al fevelave, nono Zuan al pensave a la ’Europe che al veve cognossût di frut. Di une bande segnade di un confin cun vuardiis talianis par di ca e austriacs par di là. Un confin, un toc di tiere di nissun che par podê passâlu cui si vise plui tropis cjartis e trops timbris che a coventavin. No stin fevelâ di chê altre bande. Là al jere l’infier, i comuniscj. Passât San Zuan dal Nadison al someave di jentrâ in vuere. Cjars armâts pes stradis e pes campagnis ator ator e soldâts armâts fin tai dincj. E no stin fevelâ une volte rivâts al confin di Gurize. Robis di vê pôre pardabon.”

E nono Zuan, pensant a chei tims passâts, ju confrontave cul mont di cumò, indulà che no son plui barrieris, mûrs, fii di fier e tant mancûl cjars armâts, ma dome bielîs stradis, diretis là che si vûl lâ, baste ve timp par zirâlis.

“Ma pardabon - si domandave - chei ferabuts che us guviernin e che us comandin, àno intenzion di faus tornâ come che a jerin a pene finide la vuere? Ma no lu capissino che al è miôr, ancje par lôr, invece di difindi dome i lôr interès di sachete, miorâ cheste Europe che a vin fate, la vite dai siei popui de sô int vere: Furlans, Slovens, Bavarês, Ongjarês, Galizians, Catalans. Scozês, Galês e vie indenant.”

Intant, denant di chê frascje e jerin rivadis dôs corieris. La prime e jere plene di zovins francês che a tornavin di Belgrât. La seconde, invece, lu stes, plene di zovins, cheste volte todescs, e jere direte a Lignan.

Viodiju fevelâ tra di lôr come che si fossin simpri cognossûts al jemplave il cûr. Cun di plui cun Toni a vevin ordenât une, dôs trê butiliis di vin di chel bon e di sigûr parcè che in chê dì al jere il 14 di Lui a cjantavin ducj insieme la Marsigliese.

“Cui sa che no sedin propit lôr a cambiâ in miôr chest brut mont che a vin denant,” - si domandave Zuan - che cjantant cun lôr, al sintive gruessis lagrimis che i sbrissavin jù pal cuel.

di Nello Malisano